

A Poza Consei senza contestazioni

I 12 ponts a l'orden del di é stac touc dant te manco che n'ora. A la fin la informazioms su la proes de neva viabilità te Piazza del Malghèr



I amministradores de Poza con la secretèra de Comun Chiara Luchini endèna l'ùltim Consei.

Poza - N curt Consei de Comun chel de en mercol passà ai 23 de mé a Poza, che à fat fora te trei chèrt d'ora i 12 ponts a l'orden del di.

Ence la mendranza à aproà l rendicont finanzièl del 2011 prejentà dal conseier Giancarlo Dorich, na stima data "per coerenza" – à dit Alessandra Cloch – "ajache aane aproà l preventif per encorajament, ence se l ne sà puret". Stima duc a una ence per l rendicont del bilanz 2011 e la variazion al bilanz 2012 di Studafech de Poza.

Nesciun dubie nience te l'aproèr l Prum Pian sozièl del Comun general de Fascia, prejentà da l'ombolt Tullio Dellagiocoma che l'é ence ombolt de procura del Comun general per la costions sozièles; la lauda al lurier de la assistentes sozièles, jà palesèda da Dellagiocoma tel Consei general, é stata rebadida ence da pèrt de Alessandra Cloch te chest Consei. Duc a una à aproà ence la cordanza col Comun general per l'atuazion del Pian de Politica linguistica: i comuns podarà a chesta vida desfrutèr la banches de dac e l lurier de basa fat da l'ofize linguistich del Comun general per la deliberes e i

ac amministratives ence per ladin e la persona che l Comun de Poza aea tout sù per la traduzioni podarà se cruzièr ence de etres lurieres. L sostegn de duc é stat palesà ence a la mozion per l'ospedèl de Ciavaleis, per chierir de ge dèr na spenta che vae inant i lurieres per chesta struttura che la é de referiment per duta noscia comunanza.

L Consei à aproà dapò n mudament per la conzescions de frabica en deroga: per arsegurèr che no vegne mudà la destinazion di frabicac che à fat intervenc en deroga, no sarà più de besegn de sotescriber n at dal notèr. Chest l'é stat deidù aldò del prinzip de ge schivèr ai sentadins papieres e cosc che no serf, ajache ades l mudament de destinazion é descomanà da la lege. Arsegurèda che la neva regola vèl ence per duta la situazioms olache l'iter é en cors, ence Alessandra Cloch e so grop se à palesà a una.

L'é stat amò aproà l'autorizazion a la conzescion en deroga per l smaorament del Garni val de Grepa, con la speranza palesèda da Norbert Bernard che la deroga, se l'é besegn de miorèr, la ge vegne conzeduda

a duc, ence privac e artejegn, e semper duc a una l'é stat aproà na convenzion per la realizazion de na neva area residenziala te Sot Crozè.

L'assessor Fausto Lorenz à dapò portà dant l mudament al regolament de comerz sul tegnir publich, per meter a post l'area dai banchi regolarisan i mudamenc che era entravegnui mingol a l'outa ti egn passé, e l vizeombolt Lorenzo Pezzei à proponet de aproèr l sostegn del "Made in Italy agroalimentare" per valorisèr maormenter i prodoc che vegn da più davejin.

En ùltima, sun domana del conseier de mendranza Norbert Bernard, i assessores Giulio Florian e Lorenzo Pezzei à fat a saer che te Piazza del Malghèr vegn endrezà per chest istà na sistemazion a vidor con vaneses e vèlch banca da se sentèr jù e vegn mudà la viabilità proan a serèr l'azess da la man de sora per ge dèr più chiet a la piazza lascian jir ite e fora i auti demò da la pèrt bassa. Chest lurier arà n cost de 15.000 euro; se chesta soluzion se desmostra bona per la mobilità, se podarà pissèr a de etres intervenc. (lg)